

## 1. 【岔東岔西】徐汎平原作

記得讀小學該下，日日就同搞伴仔共下行路去讀書。無多<sup>1</sup>半點鐘个路程，細人仔咩，哪有好認分乖乖行？總會搵兜仔齣事來搞。摘花草、捉蟲蛎，該還毋數算<sup>2</sup>。大路項車仔過上過下，偈兜就會看準車影仔，等佢一過就跳啊起！麼人係踏著抑徑著影仔就算輸，愛分贏个人拘額頭。

放轉<sup>3</sup>該下，除忒逛入雜貨店買冰食，幾個人還會湊等去行細路仔、行田脣，堵著路口就轉彎、再轉彎，三十分鐘來行个路，硬硬行忒歸點鐘仔正轉到屋。大人講：「哼！拈揚尾、打草蝻，岔東岔西，愛行若<sup>4</sup>毋行！」偈有行啊！行較久得也。

到大也，不管去到哪個新城市生活抑遠寮，偈本本當好大街、細路、小巷一哪串上串下去探路、看風景。當記得有一擺，自家一儕坐巴士去九份寮，逛過金瓜石黃金博物館，又蹶上長長个礮仔去看神社个遺跡。九份該盡有名个老街鬧熱煎煎仔，一踏

<sup>1</sup> 無多：音 moˋ doˋ；不多於，即「不到」之意。

<sup>2</sup> 毋數算：音 mˋ sii son；不算數，指除此之外，還有更甚之事。

<sup>3</sup> 放轉：音 biong zonˋ；放學回家。

<sup>4</sup> 若：音 naˋ；好似，此句意為「要走不走似的」。

啊入就同人尖上尖下相極仔<sup>5</sup>。總算對街尾鑽出來也！心肝肚一息就無想再過對原路躡<sup>6</sup>轉去！

這時節，堵好看著某某步道个牌仔，該無就來去行看啊好哩！就跔等礮仔上。無想著，一行起勢，嘎行入山肚去也。除忒盡頭先看著一個像仙人樣仔个老阿伯仔、較過兜仔堵著一細陣人，歸個山林就淨伸著蟲叫、鳥聲同微風，還有自家个啟氣聲。一下溜崎、一下上崎，遠遠有一細搭仔頭擺人留下來个屋跡，看著有兜仔淒涼。頓腳下來，臥頭看天，日頭轉影也，這……算來愛行去哪呢？摸等哼哼跳个心肝，到這下正感覺著：「唉唷！膽膽<sup>7</sup>哦！」好得，轉一個彎，堵著林間个細伯公廟，打幫伯公指路，過無幾久，就行到另外一頭个登山口也。

出啊來，翻轉頭詳細看告示牌，正知講這條山路安到「小粗坑古道」！旨落山个日頭，同猴硯國小面前、基隆河兩脣个沙蔗花<sup>8</sup>晟到金若若仔。偈就在這燒暖个冬下頭，踏上像用金仔鋪設个大路，一路行到猴硯火車頭。過後，又跔等「貓村」个貓仔遊遊野野一站仔，正甘願坐車轉屋。

哼！岔東岔西，毋行就毋行，一行嘎害人心驚！十年前个懸膽<sup>9</sup>，這下斯毋敢哩！

<sup>5</sup> 相極仔：音 xiongˋ kid eˋ；與人互相推擠。

<sup>6</sup> 躡：音 liung；竄、鑽。

<sup>7</sup> 膽膽：音 damˋ damˋ；內心感到怕怕的。

<sup>8</sup> 沙蔗花：音 saˋ za faˋ；甜根子草花。

<sup>9</sup> 懸膽：音 ngong damˋ；因為無知、不作多想而有的勇氣。



### 3. 【坐米籬沾屎朏】徐姿華原作

頭擺，阿爸在河壩埔有一埕地，種枇杷同鸚哥桃，還有幾下個莊肚个阿叔、阿伯也在該位種兜仔楊桃、葡萄、李仔這兜。

河壩个枇杷園較平洋、好做事，毋過，愛去河壩園還有一項挑戰，就係愛坐流籠過河壩；河壩水大又急，有三、四十公尺闊，這兜阿叔、阿伯也識探過幾下到竹笕橋，毋過毋使幾久就會分水打走。高不將，大家出錢出力拉一條鋼索做流籠，正起勢係用大米籬絹麻索，過秦鐵線圈做流籠，還愛用人力拉；尾下，正改用電動个白鐵籃仔流籠。

第一擺坐流籠又驚又好，阿爸先溜過河壩埔該向，阿姆同流籠拉轉來，佢揪核索仔喊佢入米籬肚坐好，過咁同做事愛用著个傢啦伙、水同飯包，做下放入米籬肚，就同阿爸搵手，順續仔同米籬搵出去。該流籠溜當遠，一下仔就溜到河壩中央，佢嚇一下「噉」到大嫲聲，阿爸在該片煞力牯拉，同佢拉到厥身邊。等嚇到面壠青个佢踏出米籬，還過同東西拿拏了後，就換阿爸同阿姆搵手，阿姆就同流籠拉轉去，正坐等流籠同阿爸兩片向搵拉，當遠就過河壩咧。

萬事起頭難，有經驗了後吾膽就較在哩，曉得享受坐流籠个趣味哩！該咻聲仔，就溜到一、兩十公尺遠个刺激，好比這下个雲霄飛車；去河壩園搵手，有好坐兩轉个流籠，這係分佢盡好个獎勵。

熱天个下晝頭，輒常會打風馳，雨若較早落，佢兜就歇睏一下等雨停再過做，若係雨較暗正落，阿爸就會放工轉早夜。有一擺，四點空仔就落大雨，阿爸看做毋成事咧，就喊大家收收啊，愛轉哩！

去到流籠頭，堵著核等葡萄个阿平叔，地泥項還放等一擔。佢原本按算自家拉四轉流籠，同葡萄載轉屋下，熱心个阿爸就同佢搵手，一儕同一籠葡萄共下坐過河壩。雨緊落，河壩水緊張起來，大人企在大米籬肚緊拉索仔渡河；換佢愛過河壩咁，阿姆喊佢愛坐好。到河壩中央，該水嘎浸著米籬底，吾个屎朏黏時就沾著該冰冰涼涼个河壩水。看等該黃泥色个大浪拋等來，實在當得人驚，佢忍等毋敢噉，真無簡單正耐到岸脣。

這下想起該坐米籬沾屎朏个事情，好笑又心酸。阿姆講該當時，等在流籠頭个佢，乜驚佢會分水打走，硬硬忍敲一層皮咧呢！

